

COMUNICATO n. 921 del 16/04/2025

'Z mangda nemmen toal di djungen zbisnen in 18 un in 29 djar vor di khempf boa paitn in alpinar raum

Rat von djungen Eusalp ma makse meldn vor atz 31 von madjo

[Cimbro] Klima bèkslom, di biodeversitét boda geat hèrta mearar vorliarantese, di aute boda auvülln di beng in di teldar: dise soinz di khempf vor in alpinar raum boma mocht ânemmen pittnar gelaichegen stratedjì zbisnen in Alpinar Redjongen vodar Européan Uniong (Eusalp), zoa azta ünsarne pèrng mangz auzhaltn un gian vürsnen in di djar boda khemmen. Haür o, di djungen djeneratziongen mang helvan zo riva aftz ditza zil daz peste boma mage nemmante toal in Rat von Djungen vo Eusalp. Di djungen boda hãm zbisnen in 19 un in 29 djar un lem in ummana von 48 redjongen boda soinn toal vo Eusalp in Beleschlânt, Taütschlânt, Frãntscha, Österraich, Slovenja, Svaitz un Liechtenstein mang inngem soi kandidatùr sin atz 31 von madjo 2025.

Dar Rat von Djungen vo Eusalp iz gemacht vo 28 toalnemmar (viare vor aniaglaz alpinar Lânt) un bartn stian au vor a djar un mang khemmen vornaügart vor an ândarz.

A plattform ubar di grentzan zo geba vèrt in djungen

Dar Rat von djungen lekk au a plattform zoa zo macha nemmen toal in djungen aftaz sèll boda auzmachan di organe vo Eusalp un sichart ke soine idee un daz sèll bosa vürleng khemm gehaltet guat. Di toalnemmar lengse untar vürzovüara politike un prodjèkte vor in alpinar raum vor di sèlln khempf boda hãm da grözarste aile. Da mang vorleng konkrètege arbatn, prodjèkte un initziativan, vorleng idee in politike von State von redjongen vo Eusalp un machan vorstian in konkrèt bazta mage khemmen getânt in soine redjongen. Di djungen organizarnse un lirn zo nemma toal in demokrategen protzessan haltante kunt von linguistik un kulturàln diferentzan. Eusalp sèlbart lirnt von djungen un nimp â naïge idee vo berda bart lem in di djar boda khemmen afte Alpm.

Dar Rat vinntze viar odar vüñf vert vor aniaglan mandàtt un mittarbatet auz pa djar nützante di stuméntn von web vennantese in tematesche khnöpf vürzovüara konkrètege sachandarn. Di djungen augelekk arbatn vor a mobilitét boma mage auhaltn, da arbatn ume ândre initziativan gemacht vo djunge, un süachan zo vorstiana baz ma mage tüan vor di alpinar redjongen auz ar a bege in di djar boda khemmen un machan khennen in kulturàl schatz von Alpm.

Kandidatùrn sin atz 31 von madjo 2025

Di djungen boda soinn interesàrt hãm zait sin atz 31 von madjo zo kandidarase durch in portàl <https://alpine-region.eu/alpine-youth/get-involved>. Dar Rat von djungen hatt 'z zil zo übarlega bia di Alpm soinn ândarst vo redjong in redjong un vor daz sèll bartma zornìrn haltante kunt vo ditza, zoa azta di djungen khemmen vo alln di simm Lentar vo Eusalp, soinz saiz puam, saiz diarnen un vo mearare esperientzan in di organizaziongen. Di State un di redjongen Eusalp bartn zaln di viazan zo giana afte trèff boda bartn nemmen toal di djungen von Rat un bartnen nâstian zo khöda bia un baz.

Dar Rat von djungen iz augehaltet von prodjèkt Alpinar Interedjonàl Raum "Support Eusalp", dar hauppartnen vo disan prodjèkt iz di Redjong Proventz-Alpm-Côte d'Azur. Vor disan prodjèkt, di Redjong Bourgogne-Franche-Comté iz vorantbortlich vor allz bazta âgeat in djungen. Darzuar, vorz djar 2025, di

mitt-vorsitzarung Österraich/ Liechtenstein vo Eusalp gitt an groazan vèrt dar arbat gemacht innzovånga di djungen.

Zo bizzasan mearar:

Websait von Rat von Djungen vo Eusalp: <https://alpine-region.eu/alpine-youth>

Informatziongen übar Eusalp: <https://alpine-region.eu/>

Da gekhluppet: dar plakatt

Übarsetzt von Schaltarle vor di zung von Toalkamou vodar Zimbar Hoachebene

(cdt)